

МУИС-ИЙН ТЕХНОЛОГИ ДАМЖУУЛАХ ЖУРАМ
НЭГДҮГЭЭР БҮЛЭГ. НИЙТЛЭГ ҮНДЭСЛЭЛ

1 дүгээр зүйл. Журмын зорилт, хамрах хүрээ

1.1 МУИС-ийн технологи дамжуулах журмын зорилт нь МУИС-ийн хэрэгжүүлсэн болон хэрэгжүүлж байгаа төсөл, хөтөлбөрүүдийн үр дүнд шинээр бүтээсэн, сайжруулан хөгжүүлсэн технологийг эзэмших эрх эдлэх, түүнийг зах зээлд нэвтрүүлэх, түүнээс орох ашгийг хуваарилахтай холбогдсон харилцааг зохицуулахад оршино.

1.2 МУИС-ийн технологи дамжуулах журам /цаашид “Журам” гэх/ нь Монгол Улсын хууль тогтоомж, Засгийн Газрын шийдвэр, Монгол Улсын нэгдэн орсон олон улсын гэрээ, МУИС-ийн Оюуны өмчийн талаар баримтлах бодлого зэргийг дагаж мөрдөнө.

1.3 Энэ журам нь МУИС-ийн харьяа бүрэлдэхүүн сургууль, хүрээлэн, төв, лаборатор болон МУИС-ийн хэрэгжүүлэх бусад төсөл, хөтөлбөрүүдэд нэгэн адил үйлчилнэ. МУИС-ийн оролцоотой салбар дундын (interdisciplinary) хүрээлэн, төв, лабораторийн судлаачийг энэхүү журамд хамруулах зорилгоор гэрээт судалгааны ажил гүйцэтгэгч гэж тооцно.

1.4 Энэ журам нь оюуны өмчийн хэлбэрээр хамгаалагдах технологийг эзэмших, арилжаалах, түүнээс орох ашгийг хуваарилахтай холбогдсон бүх эрхийг тодорхойлохоос гадна технологийн биет бүтээгдэхүүнийг ашиглах, захиран зарцуулах талаарх МУИС-ийн бодлогыг хэрэгжүүлэх үйл явцыг тодорхойлно.

2 дугаар зүйл. Журмын нэр томъёоны тодорхойлолт

2.1 Энэ журамд хэрэглэсэн дараах нэр томъёог дор дурдсан утгаар ойлгоно.

2.1.1 “Технологи” гэж шинэ бүтээл, ашигтай загвар, нээлт, компьютерийн програм, түүнчлэн төрөл бүрийн хэлбэрээр бичигдсэн мэдээлэл, бичмэл материалыг оруулан өргөн хүрээгээр ойлгоно. Мөн “технологи” гэсэн ойлголтод шинжлэх ухаан, технологийн үйл ажиллагааны үр дүнд бий болж, эдийн засаг, нийгмийн үр ашиг авчрах шинэ болон шинэчлэн сайжруулсан бүтээгдэхүүн, үйлчилгээ, технологийн шийдлийг илэрхийлэх инновацийг хамруулна.

2.1.2 “Судлаач” гэж МУИС-ийн дүрэмд заасан багш, ажилтныг;

2.1.3 “Зочин судлаач” гэж МУИС-ийн хэрэгжүүлж байгаа төсөл хөтөлбөрт гадны байгууллагаас хамрагдан оролцож байгаа этгээдийг;

2.1.4 “Суралцагч” гэж Монгол Улсын Дээд боловсролын тухай хуулийн 15.1-д заасан этгээдийг, мөн докторын дараах сургалтанд хамрагдаж байгаа этгээдийг;

2.1.5 “МУИС-ийн нэгж” гэж МУИС-ийн дүрэмд заасан бүрэлдэхүүн сургууль, тэнхим, лаборатори, профессорын баг, МУИС-ийн бүрэлдэхүүн болон харьяаллын нэгжийг;

2.1.6 “Патент” гэж Монгол Улсын Патентийн тухай хуулийн дагуу тухайн шийдэл нь шинэ бүтээл, бүтээгдэхүүний загвар болохыг тодорхойлж, зохиогч эсвэл түүнээс эрхийг нь шилжүүлэн авсан этгээд, тодорхой хугацаанд түүнийг эзэмших онцгой эрхтэй болохыг хүлээн зөвшөөрч, Төрийн эрх бүхий байгууллагаас олгож байгаа баримт бичгийг;

